

Naqqiut

(Allaaserisap siornanit ilapittorneqarnera)

Uunga siunnersuut: Aningaasarsianik akileraarutit pillugit Inatsisartut inatsisaata allanngortinneqarnera pillugu Inatsisartut inatsisissaat

(Aningaasaqarnermut Naligiissitaanermullu Naalakkersuisoq)

Saqqummiussissut

(Aningaasaqarnermut Naligiissitaanermullu Naalakkersuisoq)

Siullermeerneqarnera

Naalakkersuisut sinnerlugit Aningaasarsianik akileraarutit pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut saqqummiuppara.

Nussuinermi akiliisitsisarnermik suliniuteqarnermut atatillugu akileraartussaatitaasut nammineerluni nalunaaruteqarnissamut killiliussap qaangiunneranit ullanngortinneqarnera pillugu Inatsisartut inatsisissaattut siunnersuut saqqummiuppara. Ullumikkut akileraartarnermut ingerlatsivik qinnuiginnitsillugu allakkatigut uppernarsaatit taamaallaat tunniunneqartussaatitaapput.

Piginnaatitsissut nalunaarutikkut, aallaqqaammut suliffeqarfinnik akileraartussaatitaasunik il.il., amerlanerpaanik nakkutigisanik nuussisarnernik ingerlataqartut, ingerlaavartumik allakkatigut uppernarsaatinik tunniussisarnissamik peqquneqarnerannik aallartissasoq ilimagineqarpoq.

Siunnersuut allakkatigut uppernarsaatit pitsaanerulererannut kinguneqassasoq, akileraaruseriffiit nakkutigisaasunik nuussinernik malinnaalluarnerulererannik, kiisalu Kalaallit Nunaanni kukkunersiuisut allakkatigut uppernarsaatinik suliaqarnermik akileraartussaatitaasunik ikiuinermi misilittagaqarnerulersitsissasoq, ilimagineqarpoq.

Tulliullugu aamma Pisortat ikorsiissutaat pillugit Inatsisartut inatsisaata 2022-mi upernaakkut ataatsimiinnermi akuerineqarnerata malitsigisaanik allannguinertermik imaqarpoq.

Naggasiullugu ingerlatseqatigiiffinnik atorunnaarsitsinermi iluanaarutisianik akileraarusiisarnermik eqquassinikkut akileraartarnermi inatsimmi amigaatigineqartup aaqqinneqarnissaa siunnersuutigineqarpoq. Atorunnaarsitsineq isumaqarpoq, ingerlatseqatigiiffimmik nammineerluni atorunnaarsitsineq. Ullumikkut ingerlatseqatigiiffinnik matusinermi iluanaarutit, pisut immikkullarissut ataasiakkaat eqassanngikkaanni akileraaruserneqartanngillat. Aningaasat ingerlatseqatigiiffimmik matuneqartumi ingerlatseqatigiiffiit akileraarutaannik, maannakkut 25 procentiusumik akileraaruserneqartarput. Aningaasat taakku aningasariatut iluanaarutisiatulluunniit akilerneqartuugunik, nalinginnaasumik 42 imaluunniit 44 procentimik

akileraaruserneqartarput. Ingasalaartumik oqaatigalugu akileraarusiisarnermik inatsit ingerlatseqatigiiffinnik piginnittutut assersuutigalugu soraarninngorneq pissutigalugu ingerlatseqatigiiffimmik tunisinissamik kissaaqealernermi, ingerlatseqatigiiffiup matullugu atorunnaarsinnissaa iluanaarutisianik tigusinermit pilerinarninngortitsisutut oqaatigineqarsinnaavoq.

Nalinginnaasumik akileraarnissaq pinaveersaartinniarlugu suliffeqarfiup atorunnaarsinneqarnera akileraarusiisarnikkut immikkut akilersinnaunerunera siunertarineqarsimannisaannarpooq. Taamaammat pissutsit maannakkut iliuuseqarfinginerat piffissaagallartillugu iliuuseqarnertut isigineqartariaqarpoq.

Siunnersuutilaata taassuma sapaatip akunneri kingusinnerusuni inuussutissarsiornermik ingerlatsisunit ataasiakkaanit isornartorsiorneqarpoq. Siunnersuut ingerlatseqatigiiffinnik pioreersunik nunatsinni inuusuttunut aningasaatikitsunut kinguaariinni ingerlatitseqqittarnermik pinngitsoortitsissasoq isornartorsiuisut oqarput. Tamatumani siunnersuut suliffeqarfiup pigisaanik nalilinnik kalaallinut pisisunut akisunerulersitsissasoq eqqasutigineqarpoq. Tamatumani eqqasuuteqarnermi ingerlatseqatigiiffinnik tuniniaasut siunissami aktiaatiminik aningasaatilissuarnut nunani allaneersunit pisisussanut tuniniaanissaminnik toqqaanissaannik siunnersuut kinguneqassasoq oqartoqarpoq.

Naalakkersuisut inatsit amigartoq sulilu tamanna aaqqinneqartariaqartoq isumaqarput.

Ajornartorsiut assersuusiornikkut ersarissarneqarsinnaavoq: Inuk ingerlatseqatigiiffiuteqarpoq 10 mio. kr.-nik aningaasanik sipaagaqartumik. Aningaasat taakku ingerlaavartumik iluanaarutitut aningasarsiatulluunniit akilerneqartarsimagaluarpata, taava ingerlatseqatigiiffimmit akiliutit inummut akileraarusiissutit atorlugit akileraaruserneqarsimassagaluarput. Taarsiullugu taakku suliffeqarfiup atorunnaarsinneqarnerani akilerneqarpata, taava malittarisassat maanna atuuttut malillugit akileraaruserneqassanngillat.

Taamaammat nalinginnaasumik aningaasanik akissarsiatut iluanaarutitulluunniit pissarsinani, ingerlatseqatigiiffimmik atorunnaarsitsinissaq iluanaarnarnerujussuuvoq. Inuiaqatigiinnulli ingerlatseqatigiiffimmik matusiinnarani kinguaariit nikinnerat atorlugu ingerlatitseqqinnissaq pitsauneruvoq. Inuiaqatigiinnuummi pitsaaqutit ersarilluinnarput, tassami ingerlatseqatigiiffimmi sulisut suliffeqaannassapput, ingerlatseqatigiiffimmilu pigisat nalillit aamma sumiiffimmi pigiinnarneqarlutik.

Aningaasaqarnikkut nalinginnaasumik eqqarsariartaatsimi tuniniaasup ingerlatseqatigiiffimmik tamatigut sapinngisamik akisunerpaamik tuniniaaniartarnissaa eqqarsariaasiuvoq. Assinganik pisisup ingerlatseqatigiiffimmik sapinngisamik akikinnerpaamik pisinissani misilituartartussaavaa. Taamaattoqarnerani pisisup nunanit allaneersuunera Kalaallilluunniit Nunaanneersuunera apeqqutaangnilaq. Tamatumani tuniniaasup aktiaatiminik tunisinera imaluunniit ingerlatseqatigiiffimmik atorunnaarsitsinermi pigisat tuniniarneqarneri apeqqutaatinngagit atuuppoq.

Atorunnaarsitsinermi iluanaarutit akileraarusigaanngitsut piginnittut nunatsinneersuunerat apeqqutaatinngagu kikkunnut tamanut periarfissaapput.

Ingerlatseqatigiiffit akileraarutaannik 25 procentimut appaaneq, suliffeqarfinnik atorunnaarsitsinermi akileraarutinik sipaaruteqarnermik anginerulersitsivoq. Iluanaarutisianik akileraarutip nalinginnaasumik 42-44 procentiusup atorunnaarsitsinermilu iluanaarutisiap assigiinngissutaa annertunerulerpoq, taamaalillunilu ingerlatseqatigiiffimmik matusiinnarluni atorunnaarsitsinissaq pilerinarnerulerluni. Siunnersuut una taamaalilluni ingerlatseqatigiiffinnut akileraarutip apparinnejcarnerata kingorna pingarnerulerpoq.

Akileraarusiisarnermi inatsisigut malittarisassanik assigiinngitsunik pisisusanut aningaasaatikinnerusunut kinguaariit nikinnerannik iluaqutsiisussanik imaqareernerat, Naalakkersuisut ilanggullugu erseqqissaatigiumavaat. Aningaasarsianit akileraarutinut inatsit §§ 57 aamma 58 pineqarput taakkulu tamarmik immikkut akileraarusiinissamik kinguartitsinissamut periarfissiillutik. Malittarisassat taakku akulikinnerusumik atorneqartannginnerat immaqa aamma ingerlatseqatigiiffinnik matusilluni atorunnaarsitsisarnerup ilunaarnarneruneranik patsiseqarluarsinnaavoq.

Naalakkersuisut inatsitta kinguaariinni nikittarnerit ikorfartussagai ilisimavaat. Taamaammatt Inatsisartut Ataatsimiitaliaat aamma partiit kiisalu namminersorlutik inuussutissarsiorluni peqataasut kinguaariit nikittarnerani ilungersunarsinnaasut pillugit oqaloqtiginissaannut aalajangersimavunga.

Taamaallunga siunnersuut Inatsisartunut oqaluuserisassanngortippara.